

Regio.
Nomen, a quibus
inditum.

Situs.

Cœli temperies.

Soli fertilitas.

Animalium va-
rietas.

ALBIONIS Insulæ pars Meridionalior ac maxima *Anglia* Latinis dicitur: ab *Angria* regione Westphaliæ, vulgo *Engern*, ut nonnulli volunt. Alii ab angulo nomen inditum arbitrantur, quod Orbis sit angulus: alii ab *Angloen*, opido Pomeraniæ. Goropius Anglos ab *Angle* i. hamo piscatorio deducit, quod ut inquit ille, omnia sibi adhamarent, & fuerint, ut Angli loquuntur, *Good Anglers*, i. boni hamatores. Quæ sane conjectura risum potius quam fidem meretur. Sunt qui ab Anglia Cimbrica Chersonesi regiuncula, quæ *Engelond* i. Anglorum Terra, ab Egberto Occiduum Saxonum Rege indigitata fuit, appellatam autumant: vel quasi *Engistland* i. Engisti terra: qui se ducem his Saxonibus præbuit. Sed qui Engelberti, Engelhardi, & ejusmodi Germanicorum nominum etymologiam videt, facile etiam Anglorum notationem viderit. Hi sunt Germaniæ populi qui Britanniam occuparunt, quos unam gentem fuisse, communique nomine nunc Anglos nunc Saxones vocatos docet Camdenus. Hæc ab Indigenis non uno nomine appellatur, idque etiam diversimode: in duas enim regiones eam dividunt. Pars ejus quæ Orientem & Mare Germanicum spectat ab Indigenis Anglis Saxonum populis, qui eam occuparunt sua lingua *Angliam*, vel *England* nuncupant. Occidentalior vero pars, quæ ab hac, Sabrina & Dea fluminibus discernitur, & Britannica avitæque lingua utitur, *Wallia* vel *Wallis*, a prædictis Anglis nominatur. Termini ejus Septentrionales Scotiam versus, sunt Tueda & Solveius fluvii: ad Meridiem est Gallia, & proprie dictus Oceanus Britannicus, ad Occasum Hibernia & Oceanus Hibernicus, ad Ortum Germanicus. Longa est 302 milliaria Anglica. Lata 300, a Belerio nempe ad Cantii Promontorium. Aër hic quocunque anni tempore temperatus ac clemens: Cœlum crassum, in quo facile nubes, imbres, ventique coguntur, atque eo minus frigoris æstusque, propter ipsius Cœli densitatem. Habet solum fœcundum frugiferumque, & ab omni frugum genere ita beatum, ut Cereris sedem fuisse dixerit Orpheus. Cui ad stipulatur Mamertinus aut Belga orator qui Panegyricum Constantino dixit: ubi inter alia dicit, in hac segetum tantam esse fœcunditatem, ut muneribus utriusque sufficiat, & Cereris & Liberi. Neque solum agros luxurioso ac opimo frumento, ac leguminibus supra modum scatentes habet: sed etiam cujusque generis materiam producit, præter abietem, &, ut Cæsar ait, fagum; nunc tamen est passim fagus quoque. Lauri non æque fœcunda est Thessalia. Rosmarinus vero tam copiosus, ut eo etiam ad sepes utantur. Fert item Aurum, Argentum, Cuprum, Ferrum, sed ejus exigua copia: Plumbum nigrum, & Plumbum album id est stannum in suo genere optimum in magna abundantia hic effoditur, & ad exterarum gentes effertur. Colles hic plurimi, per quos Ovium greges errant, non tantum carni delicias, sed etiam vellerum tenuitate nobiles; frequentiam Ovium juvat Cœli quædã benignitas; Terræque bonitas singularis; nam & in collibus vix arbores apparent, totaque regio a Lupis est suo privilegio immunis. Omnia etiam Pecudum Animaliumque genere abundat, præterquam Asinis, Mulis, Camelis & Elephantis.

Molossi